

# Relaziuns istoricas dal Grischun cun Son Gagl (1)

■ Son Gagl furma dapi il 1803 in chantun da la Confederaziun. Il territori chantunal odiern cumpigliava dal 16avel tschientaner fin il 1798 ils signuradis da la prinzi-abazia da Son Gagl, numnadain la Alte Landschaft (Fürstenland) ed il contadi dal Toggenburg, ultra da quai la citad imperiala libra da Son Gagl e plinavant la podestaria da la Val dal Rain, la barunia da Sax-Forstegg, il signuradi da Gams, ils contadis da Werdenberg e Sargans, la prinzi-abazia da Faveras, la podestaria da Gaster e Weesen, il contadi dad Uznach sco era la pitschna citad suverana da Rapperswil. Las relaziuns tranter il Grischun e Son Gagl, surtut cun la regiun da Sargans (cunfinanta) e dal Werdenberg, tanschan lunsch enavos en la preistorgia, sco quai ch'ils chats dal medem tip da las differentas epocas cumprovan. Las relaziuns èn s'intensivadas durant il temp roman: La Via romana Cuirra-Augusta Raurica traversava il Sarganserland e colliava la Helvezia (romana) cun la Rezia prima, e la transversala lung il Rain al Lai da Constanza era medemamain da grond'impurtanza per il traffic ed il transit tranter la Lombardia e la Rezia secunda. Ils transports organisads sin omadus tschancuns e la navigaziun sin il Lai Rivaun han mantegnì fin a la cumparsa da la viafier (1858 Rorschach-Sargans-Cuira, 1859 Turitg-Sargans-Cuira) lur impurtanza extraordinaria per il provediment dal Grischun. En il temp curretic tempriv era la claustra da Faveras, fundada enturn l'onn 730/750 oravant tut cun participaziun dals Zaccons/Victorids, in center spiritual e cultural da la Rezia dal Nord; ella aveva in possess feudal considerabel en la Currezia ed era fermamain colliada cun l'investgieu da Cuira. Il «Liber viventium» da Faveras (suenter il 800) dat perditga da relaziuns stretgas e durablas tranter Faveras e las claustras da Mustér e Müstair. Mustér e Faveras eran colliadas tras l'uschenumnada Via dals paders sur il Cunclas. En consequenza dals Artigels da Glion dal 1526 ha la claustra da Faveras pers sias dieschmas en la Republica da las Trais Lias sco era sia muntada economica e politica per il Grischun. L'archiv da la claustra da Faveras (transferi en l'archiv claustral da Son Gagl) è – sper quel episcopal da Cuira – l'archiv retic il pli impurtant per il temp d'avant il 1800. El cuntegna era ina copia da la «Lex Romana Curiensis» (avant il 750). En l'archiv claustral da Son Gagl sa chatta il codex 722, ils «Capitula Remedii». Quella claustra era medemamain in lieu da pelegrinadi (da muntada mediocra) per ils Grischuns. Il cunfin fi-



Ils contacts dal Grischun èn surtut stads intensivs cun ils contadis da Sargans (sura) e da Werdenberg.

PIXELIO: BERGGEIST / HORST SCHRÖDER

xà enturn il 1155 tranter ils investgieus da Cuira e Constanza correspundeva a quel d'enturn il 900. El tanscheva da la Planira da la Linth sur il Churfürsten e la grupa da l'Alpstein orientala fin al Hirschsprung e possedeve ina populaziun rumantscha germanisada a partir dal 11avel/12avel tschientaner nà dal Lai Rivaun e da la Val dal Rain Inferiura. Quest process ha durà en fin il 13avel–15avel tschientaner, en singuls cas en fin il 18avel tschientaner (per exempel Vetten). Correspundentamain numerus èn ils toponims ed ils nums da famiglia rumantschs (Gafafer, Gabathuler e.a.) en questas regiuns. Quels èn san mantegnids tant meglier che las structures economicas en il Son Gagl meridiunal ed en il Grischun eran en il temp medieval fitg sumegliantas, vul dir prevalentamain purilas.

Impurtanta è daventada en il 12avel e 13avel tschientaner l'expansiun domi-

nicala da las famiglias da l'auta aristocrazia en las regiuns dal Grischun e dal Son Gagl: ils signurs de Gräpplang en la regiun da Flums, ils Montforts e Werdenbergs, Vazs, Toggenburgs sco era ils Saxs. Ils Toggenburgs han ertà il 1338 tras maridaglia ils de Vaz e la mort da Friedrich VII il 1436 ha provocà en il Grischun, tras la fundaziun da la Lia da las Diesch Dretgiras sco reuniun d'ina part dal domini dals Toggenburgs, ina nova orientaziun politic-territoriala. Il medem onn ha il contadi da Sargans fatg, cunter la voluntad da ses signur, in'allianza cun la Lia Grischina, la citad da Cuira ed ils baruns de Razén. La reformaziun en il Grischun ha survegnì in succurs decisiv e constant tras Vadian ed a Cuira era activ Wolf Ulimann, oriund medemamain da Son Gagl. La Scuola da mats a Son Gagl vegniva frequentada en il 16avel tschientaner fermamain dad Engiadinais.

Las relaziuns politics tranter las Trais Lias e la regiun al nord dal Hirschsprung eran marginalas – ina consequenza da la structura da pussanza particulara da Son Gagl avant il 1803. Colliaziuns economicas èn resultatadas permanentamain da la vischinanza dal Sarganserland cun il Signuradi. Il Rain songagliais ha giugà ina rolla modesta per l'export grischun da mangiativas e rauba da diever, ma ina pli impurtanta per la flottaziun da laina da mutagl oravant tut da la Surselva. Anc il 1800 vegnivan flottads marganzia e passagers sin punteras duas giadas l'emna davent da Cuira. A Trübbach sa chattava ina gronda piazza da transgardiada e Rheineck era il port principal da vendita e da spediziun al Lai da Constanza.

La Constituziun dal chantun da Son Gagl dal 1814 s'orientava sco quella grischuna al princip da paritad confessiunala. En l'applicaziun da quella era il Son Gagl il chantun da referenza per il Grischun confessiunalmain paritetico. A Son Gagl èn s'orientadas en ils onns 1830 era las reformas da scola catolic-liberalas enturn Alois de Latour. Per il Grischun è il chantun da Son Gagl adina stà in partenari fitg impurtant en il 19avel e 20avel tschientaner en il cumbat per ils differents projects da viafier (Spleia, Lucmagn) ed en connex cun la correcziun dal Rain.

Il 1823 è vegni fundà l'investgieu da Son Gagl e collià en uniu persunala cun la diocesa da Cuira (investgieu dubel). Sut pressiu da la populaziun e da las duas regenzas chantunales è el puspè vegni aboli il 1836. Quest investgieu è vegni guvernà ils emprims decennis da Grischuns (Karl Rudolf Buol von Schauenstein 1824–33; Johann Georg Bossi 1834–47 e Johann Peter Mirer 1847–62).

Ina rolla politicamain impurtanta per ils catolic-conservativs dal chantun da Son Gagl ha giugà durant il Cumbat cultural Gion Gieri Cavelti, oriund da Saggogn, sco manader da gestiun dal «Rhein-taler Allgemeiner Anzeiger» ed editor dal «Fürstenländer» a Gossau. Sia officina ha era stampà ovras rumantschas, tranter auter la «Fabiola en romontsch. Ina critica» dad Alfons Tuor (1903). Da vart liberala ha cumbattì Anton Philipp Largiader, oriund da Sta. Maria en Val Müstair, directur dal seminaris scolastic songagliais a Rorschach 1869–76.

L'Universitad da Son Gagl (averta il 1899), ha adina giugà ina rolla (dal punct da vista quantitativ) plitost modesta per ils Grischuns. Il chantun da Son Gagl fa part dal consorzi da la Scuola da selviculturs a Maiavilla.

Adolf Collenberg

## Pfäfers (Faveras)

Claustra retic-romana, fundada enturn l'onn 730/750, surtut cun participaziun dals Zaccons/Victorids, tudestg Pfäfers (uffizial). Ils investgs Tello e Victor cumparan en lieus centrals en il «Liber viventium» claustral. Quest cudesch da fraternisaziun (suenter il 800) dat perditga da relaziuns stretgas e durablas tranter Faveras e las claustras da Mustér e Müstair. Ils Zaccons èn probablmain era ils donaturs dals gronds bains claustrals en Surselva. L'«Urbari curretic dals bains imperialis» (ca. 840) cumprova en pli possess claustrals oravant tut en il Signuradi, a Domat ed en il Surses. Questa repartiziun dal possess è era strategicamain impurtanta: en il temp autmedieval aveva la claustra possess al Spleia ed a Casaccia sco era lung la ruta dal Lai Rivaun e dal Lai da Constanza. La claustra da Faveras n'era betg mo in center spiritual e cultural da la Rezia dal Nord, ma aveva era in'impurtanza economica e politica, essend orientada tant vers il nord sco vers il sid. Quai demusan las confraternitads cun Lecco (9avel tschientaner) e Com (11avel tschientaner). En il temp medieval tardiv regivan qua surtut avats svabais ch'han manà la claustra ad ina nova fluriziun. Suenter l'acquist da la regiun da Sargans tras ils Confederads il 1483 recrutava Faveras ses avats oravant tut da la

Glaruna e da la Svizra Centrala. Il 16avel tschientaner è stà in temp ordvart difficil per l'abazia. L'avat Johann Jakob Russinger era in fitg bun ami da Zwingli ed è convertì al protestantissem pauc avant il 1531. El ha alura però revocà sia decisiun ed è puspè daventa avat da Faveras suenter l'absoluziun tras l'investg auxiliar da Cuira, Stephan Tschuggli. En consequenza dals Artigels da Glion dal 1526 ha la claustra da Faveras pers sias dieschmas en la Republica da las Trais Lias. Suenter decennis difficils ha Faveras vivi ina fluriziun barocca en il 17avel tschientaner. Il 1619 ha l'avat Michael Saxer (da Sargans) procurà che l'archiprer Nicolo Rusca, executà a Tusaun, obtegnia in ulteriu funeral a Faveras tenor las normas ecclesiasticas. Ina tavla fixada en la cripta da la baselgia claustrala regorda a quest'acziun. L'avat glarunais Jodok Hoslin (1626–37) ha tgirà, sur ils cunfins confessiunals ora, in'amicizia intensiva cun l'istoriograf (refurmà) Johannes Guler von Wynneck. En il 18avel tschientaner èn sa mussadas l'economia e la scola da la claustra en plaina fluriziun. Cuntrari a la claustra da Mustér n'ha quella da Faveras però betg pudì sa remetter dals donns subids durant la helvetica ed è vegnida serrada il 1838 tras decisiun dal Cussegl grond dal chantun da Son Gagl. L'archiv da la claustra da Faveras sa chatta en l'archiv claustral da Son Gagl ed è – sper quel episcopal da Cuira – l'archiv retic il pli impurtant per il temp d'avant il 1800. El cuntegna era ina copia da la «Lex Romana Curiensis» (avant il 750).

Werner Vogler

## Val Tamina

Vallada che colliava la regiun da Sargans cun la Val Calfeisen e sur il Pass dal Cunclas cun las vals dal Rain grischunas. La Val Tamina furma il cunfin settentrional dal Grischun cun il Calanda e cun l'alp da Mastriels. Ella fascheva part da l'uschenumnada Via da muntgs medievala che manava da Faveras a Mustér ed era apprezzada sco ruta secundara per il traffic da sauma e per guntgirs d'as a la Val dal Rain da Cuira. Per la segirtad garantiva dapi il 1206 la fortezza da Wartenstein/Ragaz. Il 1799 è arrivà il general Joseph Laurent Demont cun sias truppas tras la Val Tamina en Surselva. En la chavorgia da la Tamina sa chatta ina funtauna termala utilisada dapi il temp medieval tempriv.

Adolf Collenberg

## Sardona

Alp en la Val Calfaisa (vischnanca da Faveras), situada a ca. 1800 m al pe dal Piz Sardona, dal Piz Dolf e da la Fuorcla Trin. En il temp medieval ha appartegnì questa regiun al domini retic. 1346 Sardona. Da quel temp han colonists Gualsers da la Val dal Rain obtegnì da l'abazia da Faveras il dretg d'utilisar permanentamain l'Alp Sardona. La plipart da lur bains sa chattava sin la spunda sanestra da la Foppa da Sardona, depopolada a partir dal 15avel tschientaner. Il 1652 ha la davosa abitanta bandunà la Val Calfaisa. Il Club alpin svizzer posseda ina chamon a Sardona (2157 m). L'arena tectonica da la Sardona cumpiglia passa 300 km<sup>2</sup> en ils chantuns Glaruna, Son Gagl e Grischun. Sia strivla magica da las Set Dunschals (tudestg Tschingelhörner) sco la part la pli spectaculara è vegnida distinguida sco singulara e recepida il 2008 sin basa da sias particularitads geologicas en la glista dal Patrimoni natural mundial da l'Unesco.

Adolf Collenberg



Faveras: ruina dal chastè da Wartenstein a la via vers il Pass dal Cunclas. (Maletg da ca. 1830).

## Lexicon Istoric Retic

Il LIR cumpiglia bundant 3100 artigels (geographics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.